

14. februaari 2019

UPA2019/imm.nr 63

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Sinerissap qanittuani aalisariutit isaterneqarneranni akileraaruteqaataajunnaarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaqa Jens Napãtøk', Partii Naleraq)

Tunngavilersuut:

Kalaallit Nunaanni aalisariutit pisoqalisimallutik atorunnaarsimasut isaterneqarnissaannut tapiissutiniq pissarsinissamut periarfissaqartoqarpoq. Taamaalilluni aalisariutit atorunnaarnikut qimaannarneqarnissaat ilaatigut pisoqalisimasut atortuaannarnissaat pinaveersaartinneqassammat. Taamatulli pilersaaruteqarneq siunertaminut iluatsissimanngitsutut taasariaqarpoq.

Tapiissuteqartitsisarnermi siunertaavoq, soorlu aningaasanut inatsimmi 2019-imeersumi konto 50.06.50 allaqqavoq:

“Aningaasaliissutit ilaatigut atorneqassapput, sinerissap qanittuani ingerlaavartumik aalisariutiniq taarsiinissamut nutarterinissamullu aamma suliniutinut nutarterisinnaasunut, misileraalluni aalisarnermut assigisaanulluunniit, Kalaallit Nunaanni aalisarnikkut iluaqutigisinnaasanik ineriartortitsinertut iluaqutigisinnaasatullu nalilerneqartunut.

Kiisalu:

Aningaasat immikkoortinneqarsimasut sinerissamut qanittumi aalisarnermi angallatinik pisoqqanik isaterinermut tapiissutitut atorneqarsinnaapput. Aserorterinermut tapiissutit sinerissamut qanittumi aalisarnermi angallatinut aalajangersimasunut ukiunik 25-inik pisoqaanerusunut atugassaapput, taamaasilluni angallatit aserfallatsaaliinermi annertuumik aningaasartuutaasut sulinikkullu nukinnik annertuallaamik atuiffiusut aalisarnermit peersinneqarsinnaapput.”

Isaterinissamut tapiissutaapput. Kalaallit Nunaannili aalisariutinut isaterinissamut tapiissutit akileraaruserneqartarput, tapiissutiniq pissarsisussap akileraartarnikkut inissisimanera tunngavigalugu, imatut oqaatigalugu tapiissutisissussap akileraartarnermini qanoq annertutigisumik procentitsigut akiliisarnera pineqarluni.

Naalakkersuisunut apeqqut § 37 nr. 70, 2019-imeersumiik akissuteqartoqarpoq aalisariutit ukiunik 25-inik sinnerlugit pisoqaassuseqartut nalunaarsorneqarsimasut amerlassusaat 358-iusut akornanni 289-it sinerissap qanittuani aalisariutaapput, tassa 81 procentit ukiunik 25-inik pisoqaassuseqarlutik.

Tassungalu ilanngullugu aalisarnermut akuersissutaateqartut 66 procentiisa tassa 2/3-iisa ukiut 25-it sinnerlugit pisoqaassuseqarmata.

Nunaqqativut aalisariummik piginnittuusut nunatta iluani nalilinnik pilersitsisartuupput. Taamaattumillu aqutissiuunneqarnissaat nutarterinissaminnut suliffik ulorianartuunera pissutigalugu pisariaqarpoq, pitsaaneruseqarpoq, sillimaniarnikkut aamma pitsaaneruseqarpoq tunisassiorinissaminnut periarfissaqarnissaat pisariaqarmat. Aalisarnermik inuussutissarsiuqartut inissisimanerput pissutigalugu sallaarsariaqarpugut aalisariutaatitta ullutsinnut naleqquttumik nutarsagaallutik aammalu avatangiisitsinnut ajoqutaangitsumik maskiinanillu pitsaalluinnartumik aaqqissugaallutik inissisimanissaat pingaaruteqaaq.

Taamaattumillu tulluartsuorsorinangilaq inuussutissarsiornermi siuttuullutik ingerlatsisuusut akileraartarnikkut isaterititsinermit akilersuitittassagutsigit. Nutarsarusuttut imatut pissangimmata aalisariutitik pisoqalisimasut avatangiisitta mingutsaaliorneqarnerannut imaanut qimaannartassagaat. Inuussutissarsiornermi paasinnilluarluta siuttuusariaqarpugut taamaalilluta aalisarneq pitsaaneruseqarpoq ineriartortissinnaassagatsigu.

Sinerissap qanittuani aalisarneq imminut akilersinnaarsariaqarpoq, uumali tamanna ilaannaraa.

Taamaattumik Partii Naleqqamiik pissusissamisoortutut isigaarput isaterititsinermit tapiissutinik tiguisussaq isaterititsinermini akileraaruserneqanngitsumik tapiissutinik aalisariutip pisoqalisup isaterneqarnissaanut tapiissutisiguni, tamanna sillimaniarnermut, avatangiisintut isertitaqarluarnissamullu pissuteqarpoq.

Pisortanut aningaasatigut allaffissornikkullu kingunerisassai:

2017-inimi isaterititsinissamut 6,5 mio. koruunit tapiissutit akiliutigineqarsimapput. Akileraartarnikkut pisussaajunnaarsitaanerit 2,9 mio. koruunit naleqarsimallutik akileraartarnikkut isertitanik annaasaqarpoq, akileraartarnermut procentia annertunerpaamut 44 procentimut inissinneqarsimasuuppat.

Malugeqquneqarpoq akileraartarnikkut annertussusiineq assigiinngiaarsinnaammata apeqqutaatillugu tapiissutinik tiguisussap akileraartarnikkut inissisimanera, aalisariutit amerlassusaat, kiisalu isaterititsinermit tapiissutit amerlassusaasa tunniunneqarsimanerat.

Namminersortunut aningaasaatigut allaffissornikkullu kingunerisassai:

Aalisariutinik piginnittut 2017-inimi taamaalillutik 2,9 mio. koruunit sipaarsinnaasimavaat akileraartarnikkut annertussusia 44 procentimiitillugu.

Malugeqquneqarpoq akileraartarnikkut annertussusiineq assigiinngiaarsinnaammata apeqqutaatillugu tapiissutinik tiguisisussap akileraartarnikkut inissisimanera, aalisariutit amerlassusaat, kiisalu isaterititsinermi tapiissutit amerlassusaasa tunniunneqarsimanerat.

Innuttaasunut aningaasatigut allaffissornikkullu kingunerisassai:

Uani siunnersuummi innuttaasut aalisariummik piginnittuupput, kiisalu akileraartartuullutik.

2017-inimi isaterititsinissamut 6,5 mio. koruunit tapiissutit akiliutigineqarsimapput.

Akileraartarnikkut pisussaajunnaarsitaanerit 2,9 mio. koruuninik naleqarsimallutik akileraartarnikkut isertitanik annasaqarneq, akileraartarnermut procentia annertunerpaamut 44 procentimut inissinneqarsimasuuppat. Uanilu innuttaasoq aalisariummik piginnittuusup aningaasaq assinga sipaassavaa.

Malugeqquneqarpoq akileraartarnikkut annertussusiineq assigiinngiaarsinnaammata apeqqutaatillugu tapiissutinik tiguisisussap akileraartarnikkut inissisimanera, aalisariutit amerlassusaat, kiisalu isaterititsinermi tapiissutit amerlassusaasa tunniunneqarsimanerat.